

摘藻堂四庫全書薈要

史部

欽定四庫全書薈要

史部  
舊唐書卷七

詳校官內閣侍讀孫球



欽定四庫全書薈要卷四千九百十九

史部

舊唐書卷七

後晉司空同中書門下平章事劉 昫撰

本紀第七

中宗

睿宗

中宗太和聖昭孝皇帝諱顯高宗第七子母曰則天順  
聖皇后顯慶元年十一月乙丑生於長安明年封周王  
授洛州牧儀鳳二年徙封英王改名哲授雍州牧永隆

元年章懷太子廢其年立為皇太子弘道元年十二月

高宗崩遺詔皇太子柩前即帝位皇太后臨朝稱制改

元嗣聖元年二月皇太后廢帝為廬陵王幽於別所其

年五月遷於均州尋徙居房陵聖歷元年召還東都立

為皇太子依舊名顯時張易之與弟昌宗潛圖逆亂神

龍元年正月鳳閣侍郎張柬之鸞臺侍郎崔玄暉左羽

林將軍敬暉右羽林將軍桓彥範司刑少卿袁恕已等

定策率羽林兵誅易之昌宗迎皇太子監國總司庶政

大赦天下鳳閣侍郎韋承慶正諫大夫房融司禮卿韋  
慶等下獄甲辰命地官侍郎樊忱往京師告廟陵司刑  
少卿兼王府司馬袁恕已為鳳閣鸞臺平章事乙巳則  
天傳位於皇太子丙午即皇帝位於通天宮大赦天下  
唯易之黨與不在原限為周興來俊臣所枉陷者咸令  
雪免内外文武官加兩階三品已上加爵二等八五品  
等特減四考大酺五日以并州牧相王旦及太平公主  
有誅易之兄弟功相王加號安國相王進拜太尉同鳳

閣鸞臺三品公主加號鎮國太平公主仍賜實封通前  
滿五千戶皇親先被配沒者子孫令復屬籍仍量敘官  
爵出宮女三千丁未天后徙居上陽宮庚戌鳳閣侍郎  
同鳳閣鸞臺平章事張柬之為夏官尚書同鳳閣鸞臺  
三品封漢陽郡公鸞臺侍郎兼檢校太子右庶子同鳳  
閣鸞臺平章事崔玄暉為守內史封博陵郡公袁恕己  
同鳳閣鸞臺三品封南陽郡公敬暉為納言平陽郡公  
桓彥範為納言譙郡公並加銀青光祿大夫賜實封五

百戶右羽林大將軍遼國公李多祚進封遼陽郡王賜  
實封六百戶內直郎駙馬都尉王同皎為雲麾將軍右  
千牛將軍琅邪郡公食實封五百戶並賞誅張易之兄  
弟功其餘封各有差上天后尊號為則天大聖皇帝二  
月甲寅復國號依舊為唐社稷宗廟陵寢郊祀行軍旗  
幟服色天地日月寺宇臺閣官名並依永淳已前故事  
神都依舊為東都北都為并州大都督府老君依舊為  
玄元皇帝諸州百姓免今年租稅房州百姓給復三年

改左右肅政臺為左右御史臺韋祿慶貶高要尉房融  
配流欽州中書令楊再思為戶部尚書同中書門下三  
品京留守太僕卿同中書門下三品姚元之出為亳州  
刺史已未封堂兄左金吾將軍鬱林郡公千里為成紀  
郡王左金吾衛大將軍實封五百戶令貢舉人停習臣  
軌依舊習老子甲子立妃韋氏為皇后大赦天下內外  
官陪位者賜勲一轉大酺三日后父故豫州刺史玄貞  
為上洛郡王后母崔氏贈上洛郡王妃初韓王元嘉霍

王元軌等自垂拱以來皆遭非命是日追復官爵令備  
禮改葬有後嗣者即令承襲無後嗣者聽取親為後詔  
九品已上及集朝使極言朝政得失兼舉賢良方正直  
言極諫之士丙寅左散騎常侍譙王重福貶濮州員外  
刺史不知州事特進太子賓客梁王武三思為司空同  
中書門下三品加實封五百戶通前一千五百戶丁卯  
右散騎常侍定安郡王駙馬都尉武攸暨封定王為司  
徒更加實封四百戶通前一千戶辛未上往觀風殿朝

天后太尉安國相王旦固讓太尉及知政事遂從其請  
甲戌國子祭酒祝欽明同中書門下三品黃門侍郎知  
侍中事韋安石為刑部尚書罷知政事丙子諸州置寺  
觀一所以中興為名丁丑武三思固讓司空同中書門  
下三品武攸暨固讓司徒封王許之改封義興郡王重  
俊為衛王北海郡王重茂為溫王三月辛巳追復故司  
空英國公李勣官爵令所司為起墳改葬甲申制文明  
已來破家臣寮所有子孫並還資蔭其揚州構逆徒黨

唯徐敬業一房不在免限餘並原宥丁亥廢左右司員  
外郎其酷吏劉光業王德壽王處貞屈貞筠劉景陽等  
五人雖已身死官爵並宜追奪景陽見在貶祿州樂單  
尉丘神勣來子珣萬國俊周興來俊臣魚承曄王景昭  
索元禮傳遊藝王弘義張知默裴籍焦仁亶侯思立郭  
霜李敬仁皇甫文備陳嘉言等雖已身死並宜除名唐  
奉一配流李秦授曹仁哲並改與嶺南遠惡處己丑中  
書侍郎兼檢校相王府長史南陽郡公袁恕己為中書

令兼檢校安國相王府長史詔曰君臣朝序貴賤之禮  
斯殊兄弟大倫先後之儀亦異聖人之制率由斯道朕  
臨茲寶極位在崇高負展當陽雖受宗枝之敬退朝私  
謁仍用家人之禮近代以來罕遵軌度上及公主曲致  
私情姑叔之尊拜於子姪違法背禮情用惻然自今已  
後宜從革弊安國相王某及鎮國太平公主更不得輒  
拜衛王重俊兄弟及長寧公主姊妹等宜告宗屬知朕  
意焉先是諸王及公主皆以親為貴天子之子諸姑叔

見之必先致拜若致書則稱為啟事上志欲敦睦親族  
故下制革之庚寅衛王重俊上洛州牧王乘駟馬車鹵  
簿從諸王公已下中書門下五品已上及諸親並祖送  
禮儀甚盛事畢賜物有差辛卯以故司僕少卿徐有功  
執法平恕追贈越州都督并授一子官戊戌左右千牛  
衛各置大將軍一員罷奉宸府官員以安北大都護安  
國相王旦為左右千牛大將軍每大朝會內供奉丙午  
改秋社依舊用仲秋戊申相王旦於太常廳上王公諸

親祖送衛尉張設光祿造食禮畢賜物如衛王上洛州  
牧之儀夏四月乙丑端州尉魏元忠為衛尉卿同中書  
門下三品甲戌左庶子韋安石為吏部尚書太子賓客  
李懷遠為右散騎常侍右庶子唐休璟為輔國大將軍  
右庶子崔玄暉為特進檢校益州大都督府長史判都  
督事右庶子西留守戶部尚書弘農郡公楊再思為檢  
校揚州大都督府長史判都督事少詹事兼侍讀國子  
祭酒祝欽明為刑部尚書並依前知政事以上在春宮

故僚也乙亥張柬之為中書令戊寅追贈邵王重潤為懿德太子同官縣大雨雹燕雀多死漂溺居人四百家遣使賑給五月壬午遷武氏七廟神主于西京崇尊廟東都創置太廟社稷戊子制依舊以周隋為二王後壬辰封成紀郡王千里為成王癸巳侍中敬暉封為平陽郡王侍中桓彥範扶陽郡王賜姓韋氏中書令張柬之漢陽郡王中書令袁恕己南陽郡王特進崔玄暉海陵郡王並加授特進罷知政事吏部尚書韋安石為兼中

書令兵部尚書魏元忠為兼侍中丙申皇后表請天下  
士庶為出母為三年服年二十二成丁五十九免役癸  
卯降梁王武三思為德靜郡王定王武攸暨為樂壽郡  
王河內王武懿宗等十餘人並降為國公甲辰特進芮  
國公豆盧欽望為尚書左僕射輔國大將軍酒泉郡公  
唐休璟為尚書右僕射依舊同中書門下三品丙午制  
以鄒魯之邑百戶為太師隆道公宣尼采邑用供薦享  
又授裔孫襄聖侯崇基朝散大夫仍許子孫傳襲六月

丁巳河北十七州大水漂沒人居癸亥尚書左僕射豆  
盧欽望軍國重事中書門下可共平章檢校中書令韋  
安石中書令兼檢校吏部尚書檢校侍中魏元忠兼檢  
校兵部尚書楊再思兼戶部尚書兼檢校中書令丁卯  
祔孝敬皇帝神主於太廟廟號義宗非禮也戊辰洛水  
暴漲壞廬舍二千餘家溺死者甚衆秋七月辛巳太子  
賓客韋巨源同中書門下三品乙未以特進漢陽郡王  
張柬之為襄州刺史仍不知州事八月戊申以水災令

文武官九品以上直言極諫河南洛陽百姓被水兼損者給復一年甲子追冊故妃趙氏為恭皇后尊敬妃裴氏為皇后乙亥上親祔太祖景皇帝獻祖光皇帝世祖元皇帝高祖神堯皇帝皇祖太宗文武皇帝皇考高宗天皇大帝皇兄義宗孝敬皇帝神主于太廟皇后廟見丁丑御洛城南門觀闢象九月壬午親祀明堂大赦天下禁化胡經及婚娶之家父母親亡停喪成禮天下大酺三日戊戌太子賓客韋巨源為禮部尚書依舊知政

事冬十月癸亥幸龍門香山寺乙丑幸新安改弘文館  
為修文館辛未魏元忠為中書令楊再思為侍中十一  
月戊寅加皇帝尊號曰應天皇后尊號曰順天壬午皇  
帝皇后親謁太廟告授徽號之意大赦天下賜酺三日  
己丑御洛城南門樓觀潑寒胡戲辛丑衛王重俊為左  
衛大將軍遙領揚州大都督溫王重茂為右衛大將軍  
遙領并州大都督十二月壬寅則天皇太后崩

二年春正月丙申護則天靈駕還京戊戌吏部尚書李

嶠同中書門下三品中書侍郎于惟謙同中書門下平

章事閏月丙午朔置公主府官員乙卯以特進敬暉桓

彥範袁恕已等三人為滑洺豫刺史二月乙未刑部尚

書韋巨源同中書門下三品遣十使巡察風俗丙申僧

會範道士史崇玄等十餘人授官封公以賞造聖善寺

功也三月甲辰中書令韋安石為戶部尚書罷知政事

戶部尚書蘇瓌為侍中西京留守乙巳黃霧四塞唐休璟

請致仕許之庚戌殺光祿卿駙馬都尉王同皎壬子洛

陽城東七里許地色如水側近樹木往來車馬歷歷影  
見水中經月餘乃滅是月大置員外官自京諸司及諸  
州佐凡二千餘人超授閹官七品已上及員外者千餘  
人壬戌贈后父韋立貞太師益州都督夏四月甲戌又  
贈立貞為鄴王立貞第四人並贈郡王己卯左散騎常  
侍同中書門下三品李懷遠請致仕許之辛巳洛水暴  
漲壞天津橋六月戊寅特進朗州刺史平陽郡王敬暉  
貶崖州司馬特進亳州刺史扶陽郡王桓彥範龍州司

馬特進郢州刺史袁恕已竇州司馬特進均州刺史博陵郡王崔立暉白州司馬特進襄州刺史漢陽郡王張東之新州司馬並員外置長任舊官封爵並追奪秋七月丙午立衛王重俊為皇太子丙寅中書令兼檢校兵部尚書齊國公魏元忠為尚書右僕射兼中書令仍知兵部事吏部尚書李嶠為中書令刑部尚書韋巨源為吏部尚書依舊同中書門下三品庚午禮部尚書祝欽明為中丞蕭至忠所劾前左散騎常侍李懷遠為左散

騎常侍同中書門下三品東都留守九月祝欽明貶青州刺史壬寅辛白馬寺戊午左散騎常侍李懷遠卒壬寅置戶部侍郎一員冬十月己卯車駕還京師戊戌至自東都十一月乙巳大赦天下行從文武官賜勲一轉改河南為合宮洛陽為永昌嵩陽為乾封陽城為告城戊午兼秘書鄭普思坐妖逆配流儋州其黨與皆伏誅十二月己卯突厥默啜寇靈州鳴沙縣靈武軍大總管沙吒忠義逆擊之官軍敗績死者三萬丁巳突厥進寇

原會等州掠隴右牧馬萬餘而去甲申募能斬默啜者  
封授諸大衛大將軍丙戌以突厥犯邊京師亢旱令減  
膳撤樂河北水大饑命侍中蘇瓌存撫賑給丙申特進  
尚書左僕射兼安國相王府長史芮國公豆盧欽望為  
開府儀同三司依舊平章事軍國重事尚書右僕射兼  
中書令知兵部事齊國公魏元忠為尚書左僕射兼中  
書令仍兼知兵部事是冬牛大疫

三年春正月庚子朔不受朝會喪未再朞也庚戌以默

啜寇邊制募猛士武藝超絕者各令自舉內外羣官各  
進破滅突厥之策丙辰以旱親錄囚徒己巳遣武攸暨  
武三思往乾陵祈雨于則天皇后既而雨降上大感悅  
二月辛未制武氏崇恩廟依舊享祭仍置五品令七品  
丞其昊陵順陵置令丞如廟壬午贈太師鄧王廟號哀  
德陵號榮先置六品令八品丞庚寅改中興寺觀為龍  
興內外不得言中興辛卯幸安樂公主宅三月丙子吐  
蕃贊普遣大臣悉董熱獻方物是春自京師至山東疾

疫民死者衆河北河南大旱夏四月辛巳以嗣雍王守  
禮女為金城公主出降吐蕃贊普唐寅幸薦福寺曲赦  
雍州五月戊戌左屯衛大將軍兼檢校潞州長史張仁  
亶為朔州道大總管以備突厥丙午突厥默啜殺我行  
人臧思言六月丁卯朔日有蝕之戊子姚嵩道討擊使  
侍御史唐九徵擊姚州叛蠻破之俘虜三千計遂於其  
處勒石紀功焉是夏山東河北二十餘州旱饑饉疾疫  
死者數千計遣使賑卹之秋七月庚子皇太子重俊與

羽林將軍李多祚等率羽林千騎兵三百餘人誅武三思武崇訓遂引兵自肅章門斬關而入帝惶遽登玄武樓重俊引兵至下上自臨軒諭之衆遂散去殺李多祚重俊出奔至鄆縣為部下所殺癸卯大赦天下八月丙子改玄武門為神武門樓為制勝樓丙戌左僕射兼中書令魏元忠請致仕授特進九月丁酉兵部尚書郢國公宗楚客左衛將軍兼太府卿紀處訥並同中書門下三品吏部侍郎兼左御史臺中丞蕭至忠為黃門侍郎

兼左御史中丞同中書門下三品中書侍郎東海郡公  
于惟謙國子祭酒罷知政事庚子上皇帝尊號曰應天  
神龍皇后尊號曰順天翊聖大赦天下改元為景龍兩  
京文武官三品已上賜爵一級四品已下加一階外官  
賜勲一轉景龍元年九月甲辰特進魏元忠左授務川  
尉言與重俊通謀也庚辰侍中兼左御史臺大夫楊再  
思為中書令吏部尚書韋巨源太府卿紀處訥並為侍  
中侍中蘇瓌為吏部尚書壬戌改左右羽林衛千騎為

萬騎仍分為左右冬十月壬午彗見于西月餘而滅壬午皇后上神武頌令兩京及四大都督府皆刻之於石十二月乙丑朔日有蝕之丁丑京師雨土

二年春正月丙申滄州雨雹大如雞卵二月辛未幸左金吾大將軍陳國公陸頌宅皇后自言衣箱中裙上有五色雲起令畫工圖之以示百寮乃大赦天下癸未夜天保星墜西南有聲如雷野雉皆雊乙酉帝以后服有慶雲之瑞大赦天下內外五品已上母妻各加邑號一

等無妻者聽授女天下婦人八十已上版授鄉縣郡等

君三月丙子朔方道大總管張仁亶築受降城於河上

夏四月庚午左散騎常侍樂壽郡王駙馬都尉武攸暨

讓郡王改封楚國公癸未修文館增置大學士八員直

學士十二員己丑幸長樂公主莊即日還宮六月丁亥

改太史局為太史監罷隸秘書省秋七月辛卯台州地

震癸巳左屯衛大將軍攝右御史臺大夫朔方道行營

大總管韓國公張仁亶同中書門下三品有赤氣竟天

其光燭地經三日乃止九月甲戌黃霧昏濁冬十一月  
庚申突厥首領娑葛叛自立為可汗遣弟遮弩率衆犯  
塞己卯以安樂公主出降假皇后仗出於禁中以盛其  
儀帝及后御安福樓以觀之禮畢大赦天下賜酺三日  
癸未安西都護牛師獎與娑葛戰于火燒城師獎敗績  
沒于陣是冬西京吏部置兩侍郎銓試東都又置兩銓  
恣行囑請又有斜封授官預用秋闕

三年春正月丁卯黃霧四塞癸酉幸薦福寺乙亥宴侍

臣及近親於梨園亭二月己丑幸玄武門與近臣觀宮  
女大酺既而左右分曹共爭勝負上又遣宮女為市肆  
鬻賣衆物令宰臣及公卿為商賈與之交易因為忿爭  
言辭猥褻上與后觀之以為笑樂壬寅侍中舒國公韋  
巨源為尚書左僕射並同中書門下三品戊午兵部尚  
書鄧國公宗楚客中書令中書侍郎鄧國公蕭至忠為  
侍郎太府卿韋嗣立為兵部尚書同中書門下三品中  
書侍郎檢校吏部侍郎崔湜同中書門下平章事兵部

侍郎趙彥昭為中書侍郎同中書門下平章事庚申日  
赤紫色無光戊寅禮部尚書兼揚州大都督曹國公韋  
溫為太子少保兼揚州大都督同中書門下三品太常  
少卿兼檢校吏部侍郎同中書門下平章事夏五月丙  
戌崔湜鄭愔坐賊湜貶襄州刺史愔貶江州司馬六月  
癸丑太白晝見于東井庚子以經籍多缺使天下搜括  
壬寅以旱避正殿減膳親錄囚徒癸卯尚書左僕射楊  
再思薨秋七月乙卯朔鎮軍大將軍右驍衛將軍兼知

太史事迦業至忠配流柳州丙辰娑葛遣使來降辛酉  
幸梨園亭宴侍臣學士皇后表請諸婦人不因夫子而  
加邑號者許同見任職事官聽子孫用廕從之壬戌安  
福門外設無遮齋三品已上行香癸亥御承慶殿錄囚  
徒壬午遣使冊驍衛大將軍兼衛尉卿金河王突騎施  
守忠為歸化可汗八月乙酉特進行中書令趙國公李  
嶠為特進同中書門下三品侍中鄴國公蕭至忠為中  
書令特進鄭國公韋安石為侍中庚寅諸州各置司田

叅軍一員吐蕃贊普遣使勃祿星奉進國信贊普祖娑  
進物及上中宮安國相王太平公主有差壬辰遣十使  
巡察天下有星孛于紫宮令特進佩魚散職佩魚自此  
始也乙未親送朔方軍總管韓國公張仁亶於通化門  
外上製序賦詩乙巳幸安樂公主山亭宴侍臣學士賜  
繒帛有差九月壬戌幸九曲亭子宴侍臣學士戊辰吏  
部尚書懷縣公蘇瓌為尚書右僕射同中書門下三品  
冬十月庚寅幸安樂公主金城新宅宴侍臣學士十一

月乙丑親祀南郊皇后登壇亞獻左僕射舒國公韋巨源為終獻大赦天下見繫囚徒及十惡咸赦除之雜犯流人並放還京文武三品已上賜爵一等四品已下加一階京官及應襲岳牧入三品五品減考高年版授大酺三日壬申幸見子陵甲戌開府儀同三司芮國公豆盧欽望薨吐蕃贊普遣其大臣尚贊吐來逆女十二月壬戌前尚書右僕射宋國公唐休璟為太子少師同中書門下三品甲子上幸新豐之溫湯庚子幸兵部尚書

韋嗣立莊封嗣立為逍遙公上親製序賦詩便游白鹿  
觀甲辰曲賜新豐縣百姓給復一年行從官賜勲一轉  
是月幸驪山乙巳至自溫湯乙酉令諸司長官向醴泉  
坊看潑胡王乞寒戲

四年春正月乙卯於化度寺門設無遮大齋丙寅上元  
夜帝與皇后微行觀燈因幸中書令蕭至忠之第是夜  
放宮女數千人看燈因此多有亡逸者丁卯夜又微行  
看燈丁丑命左驍衛大將軍河源軍使楊矩為送金城

公主入吐蕃使已卯幸始平送金城公主歸吐蕃二月  
壬午曲赦咸陽始平為金城縣便幸長安令王光輔馬  
嵬北原莊癸未至自金城庚戌令中書門下供奉官五  
品已上文武三品已上并諸學士等自芳林門入集於  
梨園毬場分朋拔河帝與皇后公主親往觀之三月甲  
寅幸臨渭亭修禊飲賜羣官柳棬以辟惡丙辰游宴桃  
花園庚申京師雨木冰井溢壬戌賜宰臣已下內宴甲  
子夏四月丁亥上游櫻桃園引中書門下五品已上諸

司長官學士等入芳林園嘗櫻桃便令馬上口摘置酒  
為樂乙未幸隆慶池結綵為樓宴侍臣泛舟戲樂因幸  
禮部尚書竇希宅五月辛酉秘書監賜號王邕改封汴  
王乙丑皇后請加嗣王三品丁卯前州司兵叅軍燕欽  
融上書言皇后干預國政安樂公主武延秀宗楚客等  
同危宗社帝怒召欽融廷見撲殺之時安樂公主志欲  
皇后臨朝稱制而求立為皇太女由是與后合謀進鴆  
六月壬午帝遇毒崩于神龍殿年五十秘不發喪皇后

親總庶政癸未以刑部尚書裴談工部尚書張錫並同  
中書門下三品依舊東都留守吏部尚書張嘉福中書  
侍郎岑義吏部侍郎崔湜並同中書門下平章事又命  
左右金吾衛大將軍趙承恩右監門大將軍薛簡帥兵  
五百人往均州備譙王重福立溫王重茂為皇太子甲  
申發喪于太極殿宣遺制皇太后臨朝大赦天下改元  
為唐隆見繫囚徒常赦所不免者咸赦除之長流任放  
歸田里負犯痕瘕咸從洗滌内外官三品已上賜爵一

級四品已下加一階以安國相王旦為太子太師進封

雍王守禮為邠王壽春郡王成器為宋王宗正卿晉封  
新興王丁亥皇太子即帝位於柩前時年十六皇太后  
韋氏臨朝稱制大赦天下常赦所不原者咸赦除之內  
外兵馬諸親掌仍令韋溫總知時召諸府折衝兵五萬  
人分屯京城列為左右營諸韋子姪分統之壬辰遣使  
諸道巡撫紀處訥關內道張嘉福河北道岑義河南道  
庚子夜臨淄王諱舉兵誅諸韋武皆梟首於安福門外

韋太后為亂兵所殺九月丁卯百官上諡曰孝和皇帝  
廟號中宗十一月己酉葬于定陵天寶十三載二月改  
諡曰大和大聖大昭孝皇帝

史臣曰廉士可以律貪夫賢臣不能輔辱主誠以志昏  
近習心無遠圖不知創業之難唯取當年之樂孝和皇  
帝越自負展遷于房陵崎嶇瘴癘之鄉契闊幽囚之地  
所以張漢陽徘徊于克復狄梁公哽咽以奏論遂得生  
還庸非已力洎滌除金虎再握璫衡不能罪己以謝萬

方而更漫游以隳八政縱豔妻之煽黨則聚槁爭衡信  
妖女以撓權則彞倫失序桓敬由之覆族節愍所以興  
戈竟以元首之尊不免齊眉之禍比漢晉之惠盈輩為  
優苟非繼以命世之才則土德去也

睿宗玄真大聖大興孝皇帝諱旦高宗第八子中宗母  
弟龍朔二年六月己未生於長安其年封殷王遙領冀  
州大都督單于大都護右金吾衛大將軍及長謙恭孝  
友好學工草隸尤愛文字訓詁之書乾封元年徙封豫

王總章二年徙封冀王上初名旭輪至是去旭字上元  
二年徙封相王拜右衛大將軍儀鳳三年遷洛牧改名  
旦徙封豫王嗣聖元年則天臨朝廢中宗為廬陵王立  
豫王為皇帝仍臨朝稱制及革命改國號為周降帝為  
皇嗣令依舊名輪徙居東宮其具儀一比皇太子聖歷  
元年中宗自房陵還帝數稱疾不朝請讓位於中宗則  
天遂立中宗為皇太子封帝為相王又改名旦授太子  
右衛率長安中并司徒右羽林衛大將軍自則天初臨

朝及革命之際王室屢有變故帝每恭儉退讓竟免于禍神龍元年以誅張易之昆弟功進號安國相王遷太尉加實封其年立為皇太弟固辭不受景龍四年夏六月中宗崩韋庶人臨朝引用其黨分握政柄忌帝望實素高潛謀危害庚子夜臨淄王諱與太平公主子薛崇簡前朝邑尉劉幽求長上果毅麻嗣宗苑總監鍾紹京等率兵入北軍誅韋溫紀處訥宗楚客武延秀馬秦客葉靜能趙履溫楊均等諸韋武黨與皆誅之辛丑帝挾

少帝御安福門樓慰諭百姓大赦天下見繫囚徒常赦所不免者咸赦除之內外文武官三品已上賜爵一級四品已下加一階親皇三等已上加兩階四等已下及諸親賜勲三轉天下百姓免今年田租之半進封臨淄王為平王以薛崇簡為立節郡王鍾紹京為中書侍郎劉幽求為中書舍人並叅知機務加實封其餘封賞有差遣使分行諸道宣諭仍令往均州慰勞譙王壬寅左千牛中郎將宋王成器為左衛大將軍司農少卿同正

員衡陽王成義為右衛大將軍太府少卿同正員巴陵  
王進範為左羽林衛大將軍太僕少卿同正員彭城王  
隆業為右羽林衛大將軍黃門侍郎李日知同中書門  
下三品癸卯殿中兼知內外閑廐檢校龍武右軍仍押  
左右廂萬騎平王諱同中書門下三品中書侍郎潁川  
郡公鍾紹京為中書令中書令鄼國公蕭至忠為許州  
刺史兵部尚書逍遙公韋嗣立為宋州刺史中書侍郎  
趙彥昭為絳州刺史蕭韋趙特置位誅吏部尚書張嘉

福於懷州其日王公百寮上表咸以國家多難宜立長君以帝衆望所歸請即尊位甲辰少帝詔曰自古帝王必有符命兄弟相及存諸典禮朕以孤藐遭家艱難顧茲蒙識未洽治途茫茫四海將何所屬累聖丕基若墜于地王室多難義擇長君思與羣公推崇明聖叔父相王高宗之子昔以天下讓于先帝孝友寬簡彰信兆人神龍之初已有明旨將立太弟以為副君為王懇辭未行冊命所以東宮虛位至于歷年徹綴在辰禍變倉卒

然後稱制許立沖人欽奉前懷願遵理命上申天聖之  
旨下遂蒼生之心俯稽圖緯之文仰跂祖宗之烈擇今  
日請叔父相王即皇帝位朕退守本藩歸于舊邸凡百  
卿士敬承朕言克贊我天人之休期光我有唐之勲業  
布告遐邇咸使聞知相王上表讓曰臣以宗社事重家  
國情深誅鋤巨逆奉戴嗣主今承制旨猥推宸極在臣  
虛薄不敢祇膺循環震驚無任感哽制荅曰皇極大寶  
天下至公王者臨之蓋非獲已王先聖舊意蒼生推仰

龍光紫宸貴允係望請遵前旨勿或推讓于是少帝遜于別宮是日即皇帝位御承天門樓大赦天下常赦所不免並原之內外官四品已上加一階相王府官吏加兩階流人長流長任未還者並放還立功人王承曄已下千餘人賜爵秩有差封少帝為溫王其日景雲見乙巳中書令鍾紹京為戶部尚書越國公實封五百戶中書舍人劉幽求為尚書左丞徐國公實封五百戶並依前知政事左衛大將軍宋王成器為太子太師雍州牧揚

州大都督加實封二百戶宮人比來取百姓子女入宮  
者放還其家丙午新除太常少卿薛稷為黃門侍郎叅  
知機務丁未許州刺史梁縣侯姚元之為兵部尚書同  
中書門下三品兵部尚書韋嗣立為中書令追削武三  
思武崇訓官爵戊申蕭至忠韋嗣立趙彥昭崔湜並停  
刺史衡陽王成義封申王巴陵王進範封岐王彭城王  
隆業封薛王己酉鎮國太平公主加實封五百戶通前  
一萬戶秋七月癸丑兵部侍郎兼知雍州長史崔日用

為黃門侍郎叅知機務丙辰則天大聖皇后依舊號為  
天后追諡雍王賢為章懷太子庶人重俊曰節愍太子  
復敬暉桓彥範崔玄暉張柬之袁恕已成王千里李多  
祚等官爵丁巳河南洛陽華州並依舊名以洛州長史  
宋璟為檢校吏部尚書同中書門下三品中書侍郎岑  
羲為右散騎常侍壬戌以蕭至忠為晉州刺史韋嗣立  
為許州刺史趙彥昭為宋州刺史兵部尚書姚元之兼  
太子右庶子吏部尚書宋璟兼太子左庶子癸亥吏部

侍郎崔湜為尚書右丞罷知政事甲子右僕射許國公  
蘇瓌兵部尚書姚元之吏部尚書宋璟右常侍判刑部  
尚書岑羲並充使冊定陵丙寅姚元之兼中書令丁卯  
蘇瓌為尚書左僕射仍舊同中書門下三品宋國公唐  
休璟致仕右武衛大將軍攝右御史大夫同中書門下  
三品韓國公張仁亶右衛大將軍戊辰崔日用為雍州  
長史薛稷為右散騎常侍並停知機務特進同中書門  
下三品趙國公李嶠為懷州刺史廢司田叅軍己巳冊

平王為皇太子大赦天下改元為景雲內外官九品已上及子為父後者各加勲一轉自神龍以來直諫枉遭非命者咸令式墓天下州縣名目天授以來改為武字者並令復舊廢武氏崇恩廟其昊陵順陵並去陵名

景雲元年七月己巳制自今授左右僕射侍中中書令六尚書已上官聽讓其餘停讓追廢皇后韋氏為庶人安樂公主為悖逆庶人丁丑改太史監為太史局隸秘書省八月癸巳新除集州刺史譙王重福潛入東都構

逆州縣討平之先是中宗時官爵濫因依妃主墨勅而授官者謂之斜封至是並令罷免癸卯改門下坊為左春坊典書坊為右春坊左右羽林衛依舊為左右羽林軍九月庚戌封皇太子男嗣貞為許昌郡王嗣謙為貞定郡王冬十月甲申詔孝敬皇帝神主先祔太廟有違古義於東都別立義宗廟丁未姚元之為中書令兼檢校兵部尚書十一月己酉葬孝和皇帝于定陵辛亥太子太師宋王成器為尚書左僕射蘇瓌為太子少傅

侍中鄖國公韋安石為太子少保改封郇國公並罷知政事戊辰宋王成器為司徒兼領揚州大都督庚午太子少傅蘇瓌薨是歲韋庶人悖逆庶人並以禮改葬武三思父子剖棺戮屍

二年春正月丁未朔以山陵日近不受朝賀癸丑改泉州為閩州都督改榮州為泉州突厥默啜遣使請和親許之己未太僕卿郭元振中書侍郎張說並同中書門下平章事甲子改封溫王重茂為襄王遷于集州乙丑

追尊皇后劉氏為肅明皇后墓曰惠陵德妃竇氏為昭  
成皇后墓曰靖陵二月丁丑令皇太子監國甲辰姚元  
之左授申州刺史宋璟左授楚州刺史韋安石為侍中  
丙戌劉幽求為戶部尚書罷知政事戊子詔中宗時斜  
封官並許依舊庚申復置太子左右諭德太子左右贊  
善各置兩員戊戌郭元振為兵部尚書仍依舊同中書  
門下平章事己未改修文館為昭文館黃門侍郎李日  
知為左臺御史大夫依舊同中書門下三品夏四月庚

辰張說為兵部侍郎依舊同中書門下平章事癸未分  
瀛州置鄭州詔以釋典玄宗理均跡異拯人化俗教別  
功齊自今每緣法事集會僧尼道士女冠等宜齊行道  
集甲申韋安石為中書令宋王成器為太子賓客仍依  
舊遙領揚州大都督丙申李日知為侍中壬寅大赦天  
下重福徒黨放雪京官四品已下加一階外官賜勲一  
轉三品已下各賜爵一級天下濫度僧尼道士女冠並  
依舊又令内外官依上元元年九品已上文武官咸帶

手巾算袋武官咸帶七事鞞鞬並足其腰帶一品至五

品並用金六品七品並用銀八品九品並用鍮石魚袋

着紫者金裝着緋者銀裝景龍三年已前逋懸並放免

天下大酺五日五月庚戌復武氏昊陵順陵仍量置官

屬太平公主為武攸暨請也庚申韋安石加開府儀同

三司辛丑改西域公主為金仙公主昌隆公主為玉真

公主仍置金仙玉真兩觀壬戌殿中監竇懷貞為左臺

御史大夫同中書門下平章事六月壬午依漢代故事

分置二十四都督府閏六月初置十道按察使秋七月  
新置都督府並停唯雍洛州長史揚益荆并四大都督  
府長史階為三品八月乙卯詔以興聖寺是高祖舊宅  
有柿樹天授中枯死至是重生大赦天下其謀殺劫殺  
造偽頭首並免死配流嶺南官典受贓者特從放免天  
下大酺三日丁巳皇太子釋奠于太學己巳韋安石為  
尚書右僕射同中書門下三品兼太子賓客禮部尚書  
竇希玠為太子少傅庚午改左右屯衛為左右威衛左

右宗衛率府為左右司禦府渾儀監為太史監九月丁

卯竇懷貞為侍中冬十月甲辰吏部尚書劉幽求為侍

中散騎常侍魏知古同中書門下三品太子詹事崔湜

為中書侍郎同中書門下三品中書侍郎陸象先同中

書門下平章事韋安石為尚書左僕射東都留守侍中

李日知為戶部尚書兵部尚書郭元振為吏部尚書侍

中兼檢校左臺御史大夫竇懷貞為左臺御史大夫兵

部侍郎兼左庶子張說為尚書左丞罷知政事十一月

戊寅改太史監為太史局依舊隸秘書省改王師為傅  
三年春正月辛未朔親謁太廟癸酉上始釋慘服御正  
殿受朝賀甲戌并汾絳三州地震壞人廬舍辛巳南郊  
戊子躬耕籍田己丑大赦天下改元為太極內外官四  
品已下加一階三品已上加爵一級孔宣父祠廟本州  
取側近三十戶以供灑掃天下大酺五日特賜老人九  
十已上緋衫牙笏八十已上綠衫木笏乙未戶部尚書  
岑義左臺御史大夫竇懷貞並同中書門下三品二月

丁酉秘書增少監一員光祿大理鴻臚太府衛尉宗正

各增置少卿一員少府監將監增置少監一員國子監

增置司業一員左右臺各增置中丞一員雍洛二州并

益荆揚四大都督府各增置司馬一員仍分為左右司

馬丁亥皇太子釋奠於國學追贈顏回為太子太師曾

參為太子太保每年春秋釋奠以四科弟子曾參從祀

列于七十二賢之上辛酉廢右御史臺官員已已頒新

格式於天下夏四月辛丑制曰朕聞措刑由於用刑去

殺存乎必殺明罰峻典自古而然立制齊人於是乎在  
自我朝建國僅將百年天下和平其來已久往承隋季  
守法頗專比襲時安持綱日緩況朕薄德甚莫逮先惟  
人難理遠不如昔粵從守位三載于茲庶務煩勞不損  
畧景嘗謂自我作則感而成化痛乎迷俗忘返不威罔  
懲將至純風先歸重典比者贓賄不息渝濫公行放心  
未寧禁犯無懼此焉整革期於承平遂割小慈以崇大  
體自今已後造偽頭首者斬仍沒一房資財同用廕者

並停奪非頭首者絞其承前造偽人限十日內首使盡  
官典主司枉法受贓一匹已上先決杖一百其緣贓及  
惡狀被解及與替者非選時不得輒入京城縱家貫在  
京不得輒至朝堂妄有披訴如有此色並決杖仍加貶  
斥其先在京城者限三日內勒還上下官寮輒緣私情  
相囑者其受囑人宜封狀奏聞成器已下朕自決罰其  
餘王公已下並解見任官三五年間不須齒錄其進狀  
人別加褒賞御史宜令分察諸司五月戊寅親祀北郊

辛未大赦天下改元為延和桓彥範敬暉崔玄暉張柬之袁恕已等特還其子孫實封二百戶天下大酺五日六月癸丑戶部尚書岑義為侍中乙卯追尊則天皇后曰天后聖帝庚申幽州都督孫儉率左驍衛將軍李楷洛左威衛將軍周以悌等將兵三萬與奚首領李大輔戰于礪山為賊所敗儉沒於陣壬戌魏知古為戶部尚書仍依舊同中書門下三品秋七月庚午竇懷貞為尚書右僕射平章軍國重事己卯上觀樂於安福門以燭

繼晝經日乃止八月庚子帝傳位于皇太子自稱太上  
皇帝五日一度受朝於太極殿自稱曰朕五品已上除  
授及大刑獄並自決之其處分事稱詔令皇帝每日受  
朝於武德殿自稱曰予三品已下除授及重罪並令決  
之其處分事稱制勅甲辰大赦天下改元為先天八月  
戊申皇帝子許昌王嗣直改封郟王真定王嗣謙為郢  
王己酉以宋王成器為司空依舊遙領揚州大都督庚  
戌竇懷貞為尚書左僕射同中書門下三品仍兼御史

大夫劉幽求為尚書右僕射依舊同中書門下三品魏  
知古為侍中崔湜為中書令並監修國史丁巳立皇太  
子妃王氏為皇后癸亥劉幽求配流封州九月丁卯朔  
日有蝕之甲申封皇帝子嗣昇為陝王冬十月庚子皇  
帝親謁太廟禮畢御延喜門大赦天下壬寅祔昭成皇  
后肅明皇后神主於儀坤廟癸卯皇帝幸新豐之溫湯  
校獵於渭川十二月丁未詔禁人屠殺犬雞戊午改箕  
州為儀州

二年春正月勅江北諸州團結兵馬皆令本州刺史押

掌乙亥吏部尚書兼太子右諭德鄴國公蕭至忠為中

書令上元日夜上皇御安福門觀燈出內人連袂踏歌

縱百寮觀之一夜方罷二月丙申改隆州為閬州始州

為劍州分冀州置深州初有僧婆陀請夜開門然燈百

千炬三日三夜皇帝御延喜門觀燈縱樂凡三日夜左

拾遺嚴挺之上疏諫之乃止三月辛卯皇后祀先蠶癸

巳制勅表狀書奏牋牒年月等數作一十三十四十字

夏六月丙辰兵部尚書朔方道行軍大總管郭元振加  
同中書門下三品秋七月甲子太平公主與僕射竇懷  
貞侍中岑羲中書令蕭至忠左羽林大將軍常元楷等  
謀逆事覺皇帝率兵誅之窮其黨與太子少保薛稷左  
散騎常侍賈膺福右羽林將軍李慈李欽中書舍人李  
猷中書令崔湜尚書左丞盧藏用太史令傅孝忠僧惠  
範等皆誅之兵部尚書郭元振從上御承天門樓大赦  
天下自大辟罪已下無輕重咸赦除之翌日太上皇誥

曰朕將高居無為自今後軍國刑政一事以上並取皇帝處分開元四年夏六月甲子太上皇帝崩于百福殿時年五十五秋七月己亥上尊諡曰大聖貞皇帝廟曰睿宗冬十月庚午葬于橋陵天寶十三載二月改諡曰玄真大聖大興孝皇帝

史臣曰法不一則姦偽起政不一則朋黨生上既啟其泉源下胡息於奔競觀夫天后之時雲委於二張之第孝和之世波注於三王之門獻奇則除設盈庭納賄則

斜封滿路咸以進趨相軌姦利是圖如火投泉安得無  
敗洎景龍繼統汚俗廓清然猶投杼於乘輿之間抵掌  
於太平之日以至書頻告變上不自安宮臣致禦魅之  
科天子懷巡邊之詔彼既彎弓而射我我則號泣以行  
刑此雖鎮國之尤亦是臨軒之失夫君人孝愛錫之以  
典刑納之於軌物俾無僭偏下絕覬覦自然治道惟新  
亂階不作孝和既已失之立真亦未為得

贊曰孝和立真皆肖先人率情背禮取樂於身夷塗不

履履轍攸遵扶持聖嗣賴有賢臣

舊唐書卷七

舊唐書卷七考證

中宗本紀九月戊戌太子賓客韋巨源為禮部尚書依舊知政事○新書癸巳罷知政事綱目亦書韋巨源罷

景龍四年三月甲子夏四月○甲子下闕文書曰不書事也

睿宗本紀十月丁未姚元之為中書令○新書在十一月戊申綱目亦同新書

二年五月改昌隆公主為玉真公主○昌隆新書作崇  
昌

三年六月庚申幽州都督孫儉等與奚首領李大輔戰  
于礪山為賊所敗沒于陣○孫儉新書作孫佺網目  
亦同礪山新書作冷陁山

舊唐書卷七考證

謹案第七頁前一行追贈邵王重潤為懿德太子  
刊本邵訛郡據懿德太子傳改

第二十四頁後五行封少帝為溫王刊本脫溫字  
據新書睿宗紀增

第三十三頁後二行立皇太子妃王氏為皇后刊  
本太訛帝據新書睿宗本紀改





總校官庶吉士臣侍朝

校對官中書臣張頊

謄錄監生臣鄧肇槐

欽定四庫全書薈要

史部  
舊唐書卷八

詳校官內閣侍讀臣孫球



欽定四庫全書舊要卷四千九百二十

史部

舊唐書卷八

後晉司空同中書門下平章事劉 昫撰

本紀第八

玄宗上

玄宗至道大聖大明孝皇帝諱隆基睿宗第三子也母  
曰昭成順聖皇后竇氏垂拱元年秋八月戊寅生於東  
都性英斷多藝尤知音律善八分書儀範偉麗有非常



之表三年閏七月丁卯封楚王天授三年十月戊戌出

閣開府置官屬年始七歲朔望車騎至朝堂金吾將軍

武懿宗忌上嚴整訶排儀仗因欲折之上叱之曰吾家

朝堂干汝何事敢迫吾騎從則天聞而特加寵異之尋

却入閣長壽二年臘月丁卯改封臨淄郡王聖歷元年

出閣賜第於東都積善坊大足元年從幸西京賜宅於

興慶坊長安中歷右衛郎將尚輦奉御神龍元年遷衛

尉少卿景龍二年四月兼潞州別駕十二月加銀青光

祿大夫州境有黃龍白日昇天嘗出畋有紫雲在其上  
後從者望而得之前後符瑞凡一十九事四年中宗將  
祀南郊來朝京師將行使術士韓禮筮之著一莖孑然  
獨立禮驚曰著立竒瑞非常也不可言屬中宗末年王  
室多故上常陰引材力之士以自助上所居宅外有水  
池浸溢頃餘望氣者以為龍氣四年四月中宗幸其第  
因遊其池結綵為樓船令巨象踏之至六月中宗暴崩  
韋后臨朝稱制韋溫宗楚客紀處訥等謀傾宗社以睿

宗介弟之重先謀不利道士馮道力處士劉承祖皆善於占兆詣上布誠款上所居里名隆慶時人語訛以隆為龍韋庶人稱制改元又為唐隆皆符御名上益自負乃與太平公主謀之公主喜以子崇簡從上乃與崇簡朝邑尉劉幽求長上折衝麻嗣宗押萬騎果毅葛福順李仙龜寶昌寺僧普潤等定策誅之或曰先啓大王上曰我拯社稷之危赴君父之急事成福歸於宗社不成身死於忠孝安可先請憂怖大王手若請而從是王與

危事請而不從則吾計失矣遂以庚子夜率幽求等數十人自苑南入總監鍾紹京又率丁匠百餘以從分遣萬騎往玄武門殺羽林將軍韋播高高持首而至衆歡叫大集攻白獸立德等門斬關而進左萬騎自左入右萬騎自右入合於凌煙閣前時太極殿前有宿梓宮萬騎聞譟聲皆披甲應之韋庶人惶惑走入飛騎營為亂兵所害於是分遣誅韋氏之黨比明內外討捕皆斬之乃比謁睿宗謝不先啓請之罪睿宗遽前抱上而泣曰

宗社禍難由汝安定神祇萬姓賴汝之力也拜殿中監  
同中書門下三品兼押左右萬騎進封平王睿宗即位  
與侍臣議立皇太子僉曰除天下之禍者享天下之福  
拯天下之危者受天下之安平王有聖德定天下又聞  
成器已下咸有推讓宜膺主鬯以副羣心睿宗從之丙  
午制曰舜去四凶而功格天地武有七德而戡定黎人  
故知有大勲者必受神明之福仗高義者必為七鬯之  
主朕恭臨寶位亭育寰區以萬物之心為心以兆人之

命為命雖承繼之道咸以冢嫡居尊而無私之懷必推  
功業為首然後可保安社稷永奉宗祧第三子平王基  
孝而克忠義而能勇比以朕居藩邸虔守國彝貴戚中  
人都無引接羣邪害正兇黨實繁利口巧言讒說罔極  
韋溫延秀朋黨競起晉卿楚客交構其間潛結回邪排  
擠端善潛貯兵甲將害朕躬基密聞其期先難奮發推  
身鞠弭衆應如歸呼吸之間凶渠殄滅安七廟於幾墜  
拯羣臣於將殞方舜之功過四比武之德逾七靈祇望

在昆弟樂推一人元良萬邦以定為副君者非此而誰  
可立為皇太子有司擇日備禮冊命七月己巳睿宗御  
承天門皇太子詣朝堂受冊是日有景雲之瑞改元為  
景雲大赦天下二月又制曰惟天生烝人牧以元后維  
皇立國副以儲君將以保綏家邦安固後嗣者也朕纂  
承洪業欽奉寶圖夜分不寢日昃忘倦茫茫四海懼一  
人之未周烝烝萬姓恐一物之失所雖卿士竭誠守宰  
宣化緬懷庶域仍未小康是以求下人之變風遵先朝

之故事皇太子基仁孝因心溫恭成德深達禮體能辨  
皇猷宜令監國俾爾為政其六品已下除授及徒罪已  
下並取基處分延和元年六月兇黨因術人聞睿宗曰  
據玄象帝座及前星有灾皇太子合作天子不合更居  
東宮矣睿宗曰傳德避灾吾意決矣七月壬午制曰朕  
以寡昧虔奉鴻休本殊王季之賢早達延陵之節昔在  
聖厯已讓皇嗣之尊爰暨神龍終辭太弟之授豈唯衣  
冠所覩抑亦兆庶咸知頃屬國步不夷時艱主幼大業

有綴旒之懼寶位深墜地之憂議迫公卿遂司契篆日  
慎一日以至於今一紀之勞勤亦至矣萬方之俗化漸  
行矣將成宿願脫屣寰區昔堯之禪舜唯能是與禹以  
命啓匪私其親神器之重允歸公授皇太子基有大功  
於天地定阡危於社稷溫文既習聖敬克躋委之監國  
已移歲年時政益明庶工惟序朕之知子庶不負時歷  
數在躬宜陟元后可令即皇帝位有司擇日授冊朕方  
比迹洪古希風太皇神與化遊思與道合無為無事豈

不美歟王公百寮宜識朕意上意惶懼馳見叩頭請所以傳位之旨睿宗曰吾因汝功業得宗社今帝座有眚思欲遜避唯聖德大勲始轉禍為福易位於汝吾知晚矣上始居武德殿視事三品以下除授及徒罪皆自決之先天二年七月三日尚書左僕射竇懷貞侍中岑羲中書令蕭至忠崔湜雍州長史李晉左羽林大將軍常元楷右羽林將軍李慈等與太平公主同謀期以其月四日以羽林軍作亂上密知之因以中旨告岐王範薛

王業兵部尚書郭元振將軍王毛仲取閑廐馬及家人  
三百餘人率太僕少卿李令問王守一內侍高力士果  
毅李守德等親信十數人出武德殿入虔化門梟常元  
楷李慈於北闕擒賈膺福李猷於內客省以出執蕭至  
忠岑羲於朝皆斬之睿宗明日下詔曰朕將高居無為  
自今軍國政刑一事已上並取皇帝處分上御承天門  
樓下制曰朕承累聖之洪休荷重光之積慶昔因多難  
內屬構屯竇位深墜地之憂神器有綴旒之懼事殷家

國義感神祇吟嘯風雲龔行雷電致君親於堯舜濟黔  
首於休和遂以孟秋允昇儲貳旋承內禪繼體宸居拜  
首之請空勤讓立之誠莫展恭臨億兆二載于茲上稟  
聖謨下凝庶績八荒同軌瀛海無波不謂姦慝潛謀蕭  
牆竊發逆賊竇懷貞等並以庸妄權齒朝廷毫髮之効  
未申丘山之釁仍積共成梟獍將肆姦回太上皇聖斷  
宏通英謀獨運命朕率岐王範薛王業等躬事誅鋤齊  
斧一麾凶渠盡殪太陽朗耀澄氛霽於天衢高風順時

厲肅殺於秋序神靈協贊夷夏相歡四族之慝既清七日之祥方永爰承後命載闡休期總軍國之大猷施雲雨之鴻澤承乾之道既光被於無垠作解之恩思式覃於品物當與億兆同此惟新可大赦天下大辟罪已下咸赦除之加邠王守禮實封三百戶宋王成器申王成義各加實封一千戶岐王範薛王業各加實封七百戶文武官三品已下賜爵一級四品已下各加一階內外官人被諸道按察使及御史所摘伏咸宜洗滌選日依

次叙用丁卯崔湜盧藏用除名長流嶺表壬申王琚為  
銀青光祿大夫工部尚書封趙國公實封三百戶姜皎  
銀青光祿大夫工部尚書封楚國公實封五百戶李令  
問銀青光祿大夫殿中監實封三百戶王毛仲輔國大  
將軍左武衛大將軍檢校內外閑廐兼知監牧使霍國  
公實封五百戶王守一銀青光祿大夫太常卿同正員  
進封晉國公實封五百戶並賞其定策功琚皎令問固  
讓癸丑中書侍郎陸象先為益州大都督府長史兼劔

南道按察兵馬使尚書左丞張說為檢校中書令甲戌  
令毀天樞取其銅鐵充軍國雜用庚辰王琚為中書侍  
郎加實封二百戶姜皎殿中監仍充內外閑廐使加實  
封二百戶李令問殿中少監知尚食事加實封二百戶  
己丑周孝明高皇帝依舊追贈太原王宜去帝號孝明  
皇后宜稱太原王妃昊陵順陵並稱太原王及妃墓八  
月壬辰封州流人劉幽求為尚書左僕射知軍國重事  
徐國公仍依舊實封七百戶制曰凡有刑人國家常法

掩骼埋胔王者用心自今已後輒有屠割刑人骨肉者

依法科殘害之罪九月司空兼揚州大都督宋王成器

為太尉兼揚州大都督益州大都督兼右金吾大將軍

申王成義為司徒兼益州大都督單于大都護兼左金

吾大將軍邠王守禮為司空癸丑封華嶽神為金天王

九月丁卯宋王成器為開府儀同三司尚書左僕射劉

幽求同中書門下三品檢校中書令燕國公張說為中

書令特進王仁皎為開府儀同三司己卯宴王公百寮

於承天門令左右於樓下撒金錢許中書門下五品已  
上官及諸司三品已上官爭拾之仍賜物有差郭元振  
兼御史大夫丙戌又置右御史臺冬十一月甲申幸新  
豐之溫湯癸卯講武於驪山兵部尚書代國公郭元振  
坐虧失軍容配流新州給事中攝太常少卿唐紹以軍  
禮有失斬於燾下甲辰畋獵於渭川同州刺史梁國公  
姚元之為兵部尚書同中書門下三品乙巳至自溫湯  
十一月乙丑幽求兼知侍中戊子上加尊號為開元神

武皇帝十二月庚寅朔大赦天下改元為開元內外官

賜勲一轉改尚書左右僕射為左右丞相中書省為紫

微省門下省為黃門省侍中為監雍州為京兆府洛州

為河南府長史為少尹國初以來宰相及食實封功臣

子孫一應沈翳未承恩者令量才擢用開元元年十二

月己亥禁斷潑寒胡戲癸丑尚書左丞相兼黃門監劉

幽求為太子少保罷知政事紫微令張說為相州刺史

甲寅門下侍郎盧懷慎同紫微黃門平章事

二年春正月關中自去秋至于是月不雨人多饑乏遣使賑給制求直諫言弘益政理者名山大川並令祈祭丙寅紫微令姚崇上言請檢責天下僧尼以偽濫還俗者二萬餘人甲申并州大都督府長史蕪檢校左衛大將軍薛訥同紫微黃門三品仍總兵以討奚契丹二月突厥默啜遣其子同俄特勒率衆寇北庭都護府右驍衛將軍郭虔瓘擊敗之斬同俄於城下己酉以旱親錄囚徒改太史監罷隸秘書省閏月癸亥令道士女冠僧

尼致拜父母丁卯復置十道按察使己未突厥默啜妹

壻火拔頡利發石矢軍與其妻來奔封燕山郡王授左

衛員外大將軍紫微侍郎趙國公王琚左授澤州刺史

賜實封一百戶餘並停丁亥劉幽求為睦州刺史三月

甲辰青州刺史郇國公韋安石為沔州別駕太子賓客

逍遙公韋嗣立為岳州別駕特進致仕李嶠先隨子在

袁州又貶滁州別駕並員外置去年九月有詔毀天樞

至今春始夏五月辛亥黃門監魏知古工部尚書罷知

政事六月丁巳開府儀同三司宋王成器為岐州刺史  
司徒申王成義為幽州刺史司空邵王守禮為虢州刺  
史委務於上佐內出珠玉錦繡等服玩又令於正殿前  
焚之乙丑兵部尚書致仕韓國公張仁愿卒七月薛訥  
與副將杜賓客崔宣道等總兵六萬自檀州道遇賊於  
灤河為賊所敗訥等屏甲遁歸減死除名為庶人辛未  
光祿卿竇希瑊為太子太傅房州刺史襄王重茂薨於  
梁州諡曰殤帝丙午昭文館學士柳沖太子左庶子劉

子立刊定姓族系錄二百卷上之以興慶宮諸王傳並  
停京官所帶跨巾算袋每朝參日着外官衙日着餘日  
停吐蕃冠臨洮軍又遊寇蘭州渭州掠群牧起薛訥攝  
左羽林將軍隴右防禦使率杜賓客郭知運王峻安思  
順以禦之太常卿岐王範為華州刺史秘書監薛王業  
為同州刺史八月戊午西天竺國遣使獻方物九月戊  
申幸新豐之溫泉甲寅制曰自古帝王皆以厚葬為誠  
以其無益亡者有損生業故也近代以來共行奢靡遞

相倣倣浸成風俗既竭家產多至凋弊然則魂魄歸天  
明精誠之已遠卜宅於地蓋思慕之所存古者不封未  
為非遠且墓為貞宅自便有房今乃別造田園名為下  
帳又冥器等物皆競驕侈失禮違令殊非所宜戮屍暴  
骸實由於此承前雖有約束所司曾不申明喪葬之家  
無所依准宜令所司據品令高下明為節制冥器等物  
仍定色數及長短大小園宅下帳並宜禁絕墳墓塋域  
務遵簡儉凡諸送終之具並不得以金銀為飾如有違

者先決杖一百州縣長官不能舉察並貶授遠官冬十月戊午至自溫泉薛訥破吐蕃於渭川西界武階驛斬首一萬七十級馬七萬七匹牛羊四萬頭豐安軍使郎將判將軍王海賓先鋒力戰死之十一月庚寅葬殤帝於武功西原十二月乙丑封皇子嗣真為鄆王嗣初為鄂王嗣玄為鄆王時右威衛中郎將周慶立為安南市舶使與波斯僧廣造奇巧將以進內監選使殿中侍御史柳澤上書諫上嘉納之

三年春正月丁亥立郢王嗣謙為皇太子降死罪已下  
大酺三日癸卯黃門侍郎盧懷慎為檢校黃門監甲辰  
工部尚書魏知古卒二月禁斷天下採捕鯉魚十姓部  
落左廂五吐六吸右廂弩五失畢五俟斤及高麗王莫  
離支高大簡都督跌思太等各率其衆自突厥相繼來  
奔前後總二千餘帳析許州唐州置仙州夏四月岐王  
範兼虢州刺史薛王業兼幽州刺史六月山東諸州大  
蝗飛則蔽景下則食苗稼聲如風雨紫微令姚崇奏請

差御史下諸道促官吏遣人驅撲焚瘞以救秋稼從之  
是歲田收有獲人不甚饑秋七月刑部尚書李日知卒  
冬十月甲寅制曰朕聽政之暇常覽史籍事關理道實  
所留心中有闕疑時須質問宜選耆儒博學一人每日  
入內侍讀以光祿卿馬懷素為左散騎常侍褚无量並  
充侍讀甲子幸郿縣之鳳泉湯十一月己卯至自鳳泉  
湯乙酉幸新豐之溫湯丁亥妖賊崔子崑等入相州作  
亂戊子州司討平之甲午至自溫湯十二月庚午以軍

器使為軍器監置官員是冬無雪

四年春正月癸未尚衣奉御長孫昕恃以皇后妹壻與其妹夫楊仙玉毆擊御史大夫李傑上令朝堂斬昕以謝百官以陽和之月不可行刑累表陳請乃命杖殺之丁亥宋王成器申王成義以成字犯昭成皇后諡號於是成器改名憲成義改為撫刑部尚書中山郡公李乂卒二月丙辰幸新豐之溫湯丁卯至自溫湯以關中旱遣使祈雨于驪山應時澍雨令以少牢致祭仍禁斷樵

採夏六月庚寅月蝕既癸亥太上皇崩于百福殿辛未  
京師華陝三州大風拔木癸酉突厥可汗默啜為九姓  
拔曳固所殺斬其首送于京師默啜兄子小殺繼立為  
可汗是夏山東河南河北蝗蟲大起遣使分捕而瘞之  
其迴紇同羅雷勃曳固僕固五部落來附於大武軍北  
安置秋七月丙申分舊雅二州置黎州冬十月癸丑戶  
部尚書新除太子詹事畢構卒庚午葬睿宗大聖貞皇  
帝于橋陵以同州蒲城縣為奉先縣隸京兆府十一月

丁亥徙中宗神主于西廟甲午尚書左丞源乾曜為黃  
門侍郎同紫微黃門平章事辛丑黃門監兼吏部尚書  
盧懷慎卒十二月乙卯幸新豐之溫湯其夜定陵寢殿  
災乙丑至自溫湯尚書廣平郡公宋璟為吏部尚書兼  
黃門監紫微侍郎許國公蘇頲同紫微黃門平章事兵  
部尚書兼紫微令梁國公姚崇為開府儀同三司黃門  
侍郎安陽男源乾曜守京兆尹並罷知政事停十道採  
訪使

五年春正月壬寅朔上以喪制不受朝賀癸卯寅時太廟屋壞移神主于太極殿上素服避正殿輟朝五日日躬親祭享辛亥幸東都戊辰昏霧四塞二月甲戌至自東都大赦天下唯謀反大逆不在赦限餘並宥之河南百姓給復一年河南河北遭澇及蝗蟲處無出今年地租武德貞觀以來勲臣子孫無位者訪求其後奏聞有嘉遜幽棲養高不仕者州牧各以名薦三月庚戌於柳城依舊置營州都督府丁巳以辛景初女封為固安縣

主妻于奚首領饒樂郡主大酺夏四月己丑皇帝第九子嗣一薨追封夏王諡曰悼甲午以則天拜洛受圖壇及碑文并顯聖侯廟初因唐同泰偽造瑞石文所建令即廢毀六月壬午鞏縣暴雨連月山水泛濫毀郭邑廬舍七百餘家人死者七十二汜水同日漂壞近河百姓二百餘家秋七月甲子詔曰古者操皇綱執大象者何嘗不上稽天道下順人極或變通以隨時爰損益以成務且衢室創制度堂以筵因之以禮神是光孝德用之

以布政蓋稱視朔先王所以厚人倫感天地者也少陽  
有位上帝斯歆此則神貴於不黷禮殷於至敬今之明  
堂俯鄰宮掖比之嚴祝有異肅恭苟非憲章將何軌物  
由是禮官博士公卿大臣廣叅羣議欽若前古宜存露  
寢之式用罷辟雍之號可改為乾元殿每臨御依正殿  
禮九月壬寅改紫微省依舊為中書省黃門省為門下  
省黃門監為侍中冬十月丙子京師修太廟成丁丑詔  
以故越王貞死非其罪封故許王男淋為嗣越王以繼

其後戊寅祔神主于太廟十一月己亥契丹首領松漠  
郡王李失活來朝以宗女為永樂公主以妻之司徒兼  
鄧州刺史申王撝兼虢州刺史

六年春正月丙辰朔以未經大祥不受朝賀辛酉禁斷  
天下諸州惡錢行二銖四分已上好錢不堪用者並即  
銷破覆鑄將作大匠韋湊上疏請遷孝敬神主別立義  
宗廟以太子少師兼許州刺史岐王範兼鄭州刺史二  
月甲戌禮幣徵嵩山隱士盧鴻夏五月乙未孝敬哀皇

后祔于恭陵契丹松漠郡王李失活卒六月甲申瀘水  
暴漲壞人廬舍溺殺千餘人乙酉制以故侍中桓彥範  
敬暉故中書令兼吏部尚書張柬之故特進崔玄暉故  
中書令袁恕已配饗中宗廟庭故司空蘇瓌故左丞相  
太子少保郴州刺史劉幽求配饗睿宗廟庭秋七月己  
未秘書監馬懷素卒九月乙未遣工部尚書劉知柔持  
節往河南道存問冬十月丙申車駕還京師十一月辛  
卯至自東都丙申親謁太廟迴御承天門詔七廟元皇

帝已上三祖枝孫有失官序者各與一人五品京官內  
外官三品已上有廟者各賜物三十匹以備修祭服及  
俎豆賜文武官有差乙巳傳國八璽依舊改稱寶符璽  
郎為符寶郎十二月以開府儀同三司兼澤州刺史宋  
王憲為涇州刺史司徒兼虢州刺史申王撝為隆州刺  
史以太子少師兼鄭州刺史岐王範為岐州刺史以太  
子少保兼徽州刺史薛王業為虢州刺史

七年春正月吐蕃遣使朝貢三月丁酉左武衛大將軍

霍國公王毛仲加特進渤海靺鞨郡王大祚榮死其子  
武藝嗣位夏四月癸酉開府儀同三司王仁皎薨五月  
己丑朔日有蝕之秋七月丙辰制以亢陽日久上親錄  
囚徒多所原免諸州委州牧縣宰量事處置八月癸丑  
勅周公制禮歷代不刊子夏為傳孔門所受逮及諸家  
或變例與其改作不如好古諸服紀宜一依舊文九月  
甲子改昭文館依舊為弘文館宋王憲徙封寧王冬十  
月於東都來庭縣解置義宗廟辛卯幸新豐之溫湯癸

卯至自溫湯戊寅皇太子詣國學行齒胄禮陪位官及  
學生賜物有差十二月丙戌置弘文崇文兩館讐校書  
郎官員

八年春正月甲子朔皇太子加元服乙丑皇太子謁太  
廟丙寅會百官於太極殿賜物有差壬申右散騎常侍  
舒國公褚无量卒己卯侍中宋璟為開府儀同三司中  
書侍郎蘇頲為禮部尚書並罷知政事京兆尹源乾曜  
為黃門侍郎并州大都督府長史張嘉貞為中書侍郎

並同中書門下平章事二月丁酉皇太子敏薨追封懷

王諡曰哀夏五月丁卯源乾曜為侍中張嘉貞為中書

令南天竺國遣使獻五色鸚鵡六月壬寅夜東都暴雨

穀水泛漲新安澠池河南壽安鞏縣等廬舍蕩盡共九

百六十一戶溺死者八百一十五人許衛等州掌閑番

兵溺者千一百四十八人秋九月突厥欲谷寇甘源等

州涼州都督楊敬述為所敗掠契苾部落而歸以御史

大夫王峻為兵部尚書兼幽州都督黃門侍郎韋抗為

御史大夫朔方總管以禦之甲子太子少師兼岐州刺史岐王範兼太子少傅太子少保兼虢州刺史薛王業為太保餘並如故冬十月辛巳幸長春宮壬午畋于下邳十一月乙丑至自長春宮辛未突厥寇涼州殺人掠羊馬數萬計而去

九年春正月丙辰改蒲州為河中府置中都丙寅幸新豐之溫湯夏四月庚寅蘭池州叛胡顯首偽稱葉護康待賓安慕容為多覽殺大將軍何黑奴偽將軍石神奴

康鐵頭得蒙貢泉縣攻陷六胡州兵部尚書王暉發隴  
右諸軍及河東九姓掩討之甲戌上親策試應制舉人  
於含元殿謂曰古有三道今減二策近無科甲朕將存  
其上第務收賢俊用寧軍國仍令有司設食秋七月戊  
申罷中都依舊為蒲州己酉王暉破蘭池州叛胡殺三  
萬五千騎丙辰揚潤等州暴風發屋拔樹漂損公私船  
舫一千餘隻辛酉討諸酋長斬康待賓先天中重修三  
九射禮至是給事中許先景抗疏罷之九月己巳朔日

有蝕之丁未開府儀同三司梁國公姚崇薨丁巳御丹

鳳樓宴突厥首領庚申幸中書省癸亥右羽林將軍權

檢校并州大都督長史燕國公張說為兵部尚書同中

書門下三品冬十一月丙辰左散騎常侍元行沖上羣

書目錄二百卷藏之內府庚午冬至大赦天下内外官

九品已上加一階三品已上加爵一等自六月二十日

七月三日匡衛社稷食實封功臣坐事削除官爵中間

有生有死並量加收贈致仕官合佩魚者聽其終身賜

酺三日十二月乙酉幸新豐之溫湯壬午至自溫湯是冬無雪

十年春正月丁巳幸東都甲子省王公已下視品官叅佐及京三品已上官伏身職員乙丑停天下公廨錢其官人料以稅戶錢充每月准舊分例數給戊申内外官職田除公廨田園外並官收給還逃戶及貧下戶欠丁田二月戊寅至東都三月戊申詔自今内外官有犯賊至解免已上縱逢赦免並終身勿齒夏四月丁酉封契

丹首領松漠都督李鬱子為松漠郡王奚首領饒樂都

督李魯蘇為饒樂郡王五月東都大雨伊汝等水泛漲

漂壞河南府及許汝仙陳等州廬舍數千家溺死者甚

衆閏五月壬申兵部尚書張說往朔方軍巡邊戊寅勅

諸番充質宿衛子弟並放還國六月辛丑上訓註孝經

頒于天下癸卯以餘姚縣主女慕容氏為燕郡公主出

降奚首領饒樂郡王李魯蘇已巳增置京師太廟為九

室移孝和皇帝神主以就正廟秋八月丙戌嶺南按察

使裴佑先上言安南賊帥梅叔鸞等攻圍州縣遣驃騎將軍兼內侍楊思勗討之丁亥遣戶部尚書陸象先往汝許等州存撫賑給丙申博棣等州黃河堤破漂損田稼九月張說擒康願子於木盤山詔移河曲六州殘胡五萬餘口於許汝唐鄧仙豫等州始空河南朔方千里之地甲戌秘書監楚國公姜皎坐事詔杖之六十配流欽州死於路都水使者劉承祖配流雷州乙亥制曰朕君臨宇內子育黎元內修睦親以叙九族外協庶政以

濟兆人勲戚加優厚之恩兄弟盡友于之至務崇敦本克慎明德今小人作孽已伏憲章恐不逞之徒猶未能息凡在宗屬用申懲誡自今已後諸王公主駙馬外戚家除非至親以外不得出入門庭妄說言語所以共存至公之道永協和平之義克固藩翰以保厥休貴戚懿親宜書座右又下制約百官不得與卜祝之人交遊來往乙卯夜京兆人權梁山偽稱襄王男自號光常與其黨權屯營兵數百人自景風長樂等門斬關入宮城構

逆至曉兵敗斬梁山傳首東都廢河陽栢崖倉冬十月  
癸丑乾元殿依舊題為明堂甲寅幸壽安之故興泰宮  
畋獵于土宜川庚申至自興泰宮波斯國遣使獻獅子  
十一月乙未初令宰相共食實封三百戶十二月停按  
察使

十一年春正月丁卯降都城見禁囚徒流死罪減一等  
餘並原之己巳北都巡狩勅所至處存問高年鰥寡憫  
獨征人之家減流死罪一等徒以下放免庚辰幸并州

潞州宴父老曲赦大辟罪已下給復五年別改其舊宅  
為飛龍宮辛卯改并州為太原府官吏補授一準京兆  
河南兩府百姓給復一年貧戶復二年元從戶復五年  
武德功臣及元從子孫有才堪文武未有官者委府縣  
搜揚具以名薦上親制起義堂頌及書刻石紀功于太  
原府之南街戊申次晉州壇塲使中書令張嘉貞貶為  
幽州刺史壬子祠后土于汾陰之睢上昇壇行事官三  
品已上加一爵四品已上加一階陪位官賜勲一轉改

汾陰為寶鼎縣癸亥兵部尚書張說兼中書令三月庚  
午車駕至京師制所經州府縣無出今年地稅京城見  
禁囚徒並原免之夏四月丙辰遷祔中宗神主于太廟  
癸亥張說正除中書令吏部尚書中山公王峻為兵部  
尚書同中書門下三品五月己巳北都置軍器監官員  
王峻為朔方節度使兼知河北郡隴左河西兵馬使六  
月王峻赴朔方軍秋八月戊申尊八代祖宣皇帝廟號  
獻祖光皇帝廟號懿祖始祔于太廟之九廟九月己巳

頒上撰廣濟方於天下仍令諸州各置醫博士一人春秋二時釋奠諸州宜依舊用牲牢其屬縣用酒醑而已冬十月丁酉幸新豐之溫泉宮甲寅至自溫泉十一月戊寅親祀南郊大赦天下見禁囚徒死罪至徒流已下免除之昇壇行事及供奉官三品已上賜爵一級四品轉一階武德以來實封功臣知政宰輔淪屈者所司具以狀聞賜酺三日京城五日是月自京師至于山東淮南大雪平地三尺餘丁亥廢軍器監官員少府監加置

少監一人以充之十二月甲午幸鳳泉湯戊申至自鳳泉湯庚申王峻授蘄州刺史

十二年春正月夏四月封故澤王上金男義珣為嗣澤王嗣許王瓘左授鄂州別駕以弟璆為上金嗣故也癸卯嗣江王禕降為信安郡王嗣蜀王禕為廣漢郡王嗣密王徹為濮陽郡王嗣曹王臻為濟國公嗣趙王琚為中山郡王武陽郡王堪為澧國公禕等並自神龍之後相繼為王以瓘利澤王之封盡令歸宗改封焉秋七月

壬申月蝕既已卯廢皇后王氏為庶人后弟太子少保駙馬都尉守一貶為澤州別駕至藍田賜死戶部尚書河東伯張嘉貞貶台州刺史冬十一月庚申幸東都至華陰上制岳廟文勒之于石立于祠南之道周戊寅至自東都庚辰司徒申王撝薨追諡曰惠莊太子五溪首領覃行璋反遣鎮軍大將軍兼內侍楊思勗討平之閏十二月丙辰朔日有蝕之

十三年春正月乙酉以幽州都督府為大都督府戊子

降死罪從流流已下罪悉原之分遣御史中丞蔣欽緒等往十道疏決囚徒二月戊午幸龍門即日還宮乙亥初置驢騎分隸十二司丙子改幽州為邠州鄭州為莫州梁州為襄州沅州為巫州舞州為鶴州泉州為福州以避文相類及聲相近者三月甲午皇太子嗣謙改名鴻郅王嗣直改名潭徙封慶王陝王嗣昇改名浚徙封忠王鄆王嗣真改名洽徙封棣王鄂王嗣初改名涓徙封郎王嗣玄改名滉封榮王又第八子浚封為光王第

十二男濰封為儀王第十三男濤封為潁王第十六男

澤封為永王第十八男清封為壽王第二十男洄封為

延王第二十一男沐封為盛王第二十二男溢封為濟

王丙申御史大夫程行謚奏周朝酷吏來子珣萬國俊

王弘義侯思止郭霸焦仁亶張知默李敬仁唐奉一來

俊臣周興丘神勣索元禮曹仁哲王景昭裴籍李秦授

劉光業王德壽屈貞筠鮑思恭劉景陽王處貞等二十

三人殘害宗枝毒陷良善情狀尤重子孫不許仕宦陳

嘉言魚承曄皇甫文備傳遊藝四人情狀雖輕子孫不  
許近任請依開元二年二月五日勅夏四月丁巳改集  
仙殿為集賢殿麗正殿書院改集賢殿書院內五品已  
上為學士六品已下為直學士癸酉令朝集使各舉所  
部孝悌文武集於泰山之下五月庚寅妖賊劉定高率  
其黨夜犯通洛門盡擒斬之六月乙亥廢都西市冬十  
月癸丑新造銅儀成置於景運門內以示百官辛酉東  
封泰山發自東都十一月丙戌至兗州太宗頓丁亥致

齋於行宮己丑日南至備法駕登山仗衛羅列嶽下百餘里詔行從留於谷口上與宰臣禮官昇山庚寅祀昊天上帝於上壇有司祀五帝百神于下壇禮畢藏玉冊於封祀壇之石碣然後燔柴燎發羣臣稱萬歲傳呼自山頂至嶽下震動山谷上還齋宮慶雲見日抱戴辛卯祀皇地祇於社首藏玉冊於石碣如封祀壇之禮壬辰御帳殿受朝賀大赦天下流人未還者放還内外官三品已上賜爵一等四品已下賜一階登山官封賜一階

褒聖侯量才與處分封泰山神為天齊王禮秩加三公  
一等近山十里禁其樵採賜輔臣侍中源乾曜為尚書  
左丞相兼侍中中書令張說為尚書右丞相兼中書令  
甲午發岱嶽丙申幸孔子宅親設奠祭十二月己巳至  
東都時累歲豐稔東都米斛十錢青齊米斛五錢是冬  
分吏部為十銓勅禮部尚書蘇頲刑部尚書韋抗工部  
尚書盧從愿等分掌選事

十四年春正月癸亥改封契丹松漠郡王李召固為廣

化王奚饒樂郡王李魯蘇為奉誠王封宗室外甥女二人為公主各以妻之二月庚戌朔邕州獠首領梁大海周光等據賓橫等州叛遣驃騎大將軍兼內侍楊思勗討之三月壬寅以國甥東華公主降于契丹李召固夏四月癸丑御史中丞宇文融與御史大夫崔隱甫彈尚書右丞兼中書令張說鞫於尚書省丁巳戶部侍郎李元紘同中書門下平章事庚申張說停兼中書令丁卯太子少師岐王範薨冊贈惠文太子辛丑於定恒莫易

滄等五州置軍以備突厥五月癸卯戶部進計帳今年  
管戶七百六萬九千五百六十五管口四千一百四十  
一萬九千七百一十二六月戊午大風拔木發屋毀端  
門鷓鴣都城門等及寺觀鷓鴣落者殆半上以旱暴風  
雨命中外羣官上封事指言時政得失無有所隱秋七  
月癸丑夜漚水暴漲入漕漂沒諸州租船數百艘溺者  
甚衆九月己丑檢校黃門侍郎兼磧西副大都護杜暹  
同中書門下平章事是秋十五州言旱及霜五十州言

水河南河北尤甚蘇同常福四州漂壞廬舍遣御史中丞宇文融檢覆賑給之冬十月廢麟州庚申幸汝州廣成湯已已還東都十一月甲戌突厥遣使來朝辛丑渤海靺鞨遣其子義信來朝并獻方物十二月丁巳幸壽安之方秀川己未日色赤如赭壬戌還東都

十五年春正月戊寅制草澤有文武高才令詣闕自舉  
庾子太史監復為太史局依舊隸秘書省辛丑涼州都督王君奐破吐蕃於青海之西虜輜車馬羊而還二月

遣左監門將軍黎敬仁往河北賑給貧乏時河北牛畜  
大疫己巳尚書左丞相張說御史大夫崔隱甫中丞宇  
文融以朋黨相構制說致仕隱甫免官侍母融左遷魏  
州刺史夏五月晉州大水漂損居人廬舍癸酉以慶王  
潭為涼州都督兼河西諸軍節度大使忠王浚為單于  
大都護朔方節度大使棣王洽為太原冀北牧河北諸  
軍節度大使鄂王涓為幽州都督河北節度大使榮王  
滉為京兆牧隴右節度大使光王浝為廣州都督五府

節度大使儀王濉為河南牧賴王湮為安東都護平盧  
軍節度大使永王澤為荊州大都督壽王清為益州大  
都督劔南節度大使延王洄為安西大都護磧西節度  
大使盛王沐為揚州大都督並不出閤秋七月甲戌雷  
震興教門樓兩鴟吻欄檻及柱災禮部尚書蘇頲卒庚  
寅鄜州洛水泛漲壞人廬舍辛卯又壞同州馮翊縣廨  
宇及溺死者甚衆丙申改武臨縣為潁陽縣己亥赦都  
城繫囚死罪降從流徒已下罪悉免之九月丙子吐蕃

寇瓜州執刺史田元獻及王君奩父壽殺掠人吏盡取  
軍資倉糧而去丙戌突厥毗伽可汗使其大臣梅錄啜  
來朝閏月庚子突厥騎施蘇祿吐蕃贊普圍安西副大  
都護趙歸貞擊走之庚申車駕發東都還京師迴紇部落  
殺王君奩于甘州之鞏筆驛制檢校兵部尚書蕭嵩兼  
判涼州事總兵以禦吐蕃是秋六十三州水十七州霜  
旱河北饑轉江淮之南租米百萬石以賑給之冬十月  
己卯至自東都十二月乙亥幸溫泉宮丙戌至自溫泉

宮

十六年春正月庚子始聽政于興慶宮秦隴等州獠首  
領瀧州刺史陳行範廣州首領馮仁智何遊反魯叛遣  
驃騎大將軍楊思勗討之壬寅安西副大都護趙歸貞  
敗吐蕃于城曲子城甲子黑水靺鞨遣使來朝獻秋七  
月吐蕃寇瓜州刺史張守珪擊破之乙巳檢校兵部尚  
書蕭嵩鄯州都督張志亮攻拔吐蕃門城斬獲數千級  
收其資畜而還丙辰新羅王金興光遣使貢方物八月

己巳特進張說進開元大衍歷詔命有司頒行之辛卯  
蕭嵩又遣杜賓客擊吐蕃于祁連城大破之獲其大將  
一人斬首五千級九月丙午以久雨降死罪從流徙以  
下原之冬十月己卯幸溫泉宮己丑至自溫泉宮十一  
月癸巳朔檢校兵部尚書河州節度判涼州事蕭嵩為  
兵部尚書同中書門下平章事餘如故十二月丁卯幸  
溫泉宮丁丑至自溫泉宮

十七年二月丁卯雋州都督張審素攻破蠻拔昆明城

及鹽城殺獲萬人庚子特進張說復為尚書左丞相同  
州刺史陸象先為太子少保甲寅禮部尚書信安王禕  
帥衆攻拔吐蕃石堡城夏四月癸亥令中書門下分就  
大理京兆萬年長安等獄疏決囚徒制天下繫囚死罪  
減一等餘並宥之丁亥大風震電藍田山崩五月癸巳  
復置十道按察使右散騎常侍徐堅卒六月甲戌尚書  
右丞相源乾曜停兼侍中黃門侍郎杜暹為荊州大都  
督府長史中書侍郎李元紘為曹州刺史兵部尚書蕭

嵩兼中書令戶部侍郎兼鴻臚卿宇文融為黃門侍郎  
兵部侍郎裴光庭為中書侍郎並同中書門下平章事  
秋七月辛丑工部尚書張嘉貞卒八月癸亥上以降誕  
日讌百寮于花萼樓下百寮表請以每年八月五日為  
千秋節王公已下獻鏡及承露囊天下諸州咸令讌樂  
休暇三日仍編為令從之丙寅越州大水漂壞廨宇及  
居人廬舍己卯中書侍郎裴光庭兼御史大夫依舊知  
政事乙酉尚書右丞相開府儀同三司兼吏部尚書宋

璟為尚書右丞相尚書左丞相源乾曜為太子少傅九

月壬子宇文融左遷汝州刺史俄又貶昭州平樂尉壬

寅裴光庭為黃門侍郎依舊知政事冬十月戊午朔日

有蝕之不盡如鉤癸未睦州獻竹實庚申前太子賓客

元行沖卒十一月庚申親饗九廟辛卯發京師丙申謁

橋陵上望陵涕泣左右並哀感制奉先縣同赤縣以所

管萬三百戶供陵寢三府兵馬供宿衛曲赦縣內大辟

罪已下戊戌謁定陵己亥謁獻陵壬寅謁昭陵乙巳謁

乾陵戊申車駕還宮大赦天下流移人並放還左降官  
移近處百姓無出今年地稅之半每陵取側近六鄉供  
陵寢内外官三品已上加爵一等四品已下賜一階五  
品已上請父母亡者依級賜官及邑號十二月辛酉幸  
溫泉宮乙丑校獵渭濱壬申至自溫泉宮是冬無雪

十八年春正月辛卯黃門侍郎裴光庭為侍中依舊兼  
御史大夫左丞相張說加開府儀同三司丙午幸薛王  
業宅即日還宮二月丙寅大雨雪俄而雷震左飛龍廡

災三月辛卯改定州縣上中下戶口之數依舊給京官  
職田夏四月乙卯築京城外郭城凡十月而功畢壬戌  
幸寧親公主第即日還宮乙丑裴光庭兼吏部尚書是  
春命侍臣及百寮每旬暇日尋勝地讌樂仍賜錢令所  
司供帳造食丁卯侍臣已下讌于春明門外寧王憲之  
園池上御花萼樓邀其迴騎便令坐飲遞起為舞頒賜  
有差五月契丹衙官突可汗殺其主李召固率部落降  
于突厥奚部落亦隨西叛奚王李魯蘇來奔召固妻東

華公主陳氏及魯蘇妻東光公主韋氏並奔投平盧軍  
制幽州長史趙含章率兵討之六月庚申命左右丞相  
尚書及中書門下五品已上官舉才堪邊任及刺史者  
甲子彗星見于五車癸酉有星孛于畢昴丙子命單于  
大都護忠王浚為河北道行軍元帥御史大夫李朝隱  
京兆尹裴伷先為副率十八總管以討契丹及奚等事  
竟不行壬午東都漚洛泛漲壞天津永濟二橋及堤象  
門外仗舍損居人廬舍千餘家閏月甲申分幽州置薊

州已丑令范安及韓朝宗就瀍洛水源疏決置門以節水勢辛卯禮部奏請千秋節休假三日及村閭社會並就千秋節先賽白帝報田祖然後坐飲散之秋七月庚辰幸寧王憲第即日還宮八月丁亥上御花萼樓以千秋節百官獻賀賜四品已上金鏡珠囊縑綵賜五品已下束帛有差上賦八韻詩又制秋景詩辛亥幸永穆公主宅即日還宮九月先是高戶捉官本錢乙卯御史大夫李朝隱奏請薄稅百姓一年租錢克依舊高戶及典

正等捉隨月收利供官人稅錢冬十月吐蕃遣其大臣  
名悉獵獻方物請降許之庚寅幸岐州之鳳泉湯癸卯  
至自鳳泉湯十一月丁卯幸新豐溫泉宮十二月戊子  
豐州刺史袁振坐妖言下獄死戊申尚書左丞相燕國  
公張說薨是歲百寮及華州父老累表請上尊號內請  
加聖文兩字并封西嶽不允

十九年春正月壬戌開府儀同三司霍國公王毛仲貶  
為襄州別駕中路賜死黨與貶黜者十數人辛卯遣鴻

臚卿崔琳入吐蕃報聘丙子親耕於興慶宮龍池己卯  
禁採捕鯉魚天下州府春秋二時社及釋奠停牲牢唯  
用酒醕永為常式二月甲午以崔琳為御史大夫三月  
乙酉朔崔琳使于吐蕃夏四月壬午於京城置禮院丙  
申令兩京及天下諸州各置太公尚父廟以張良配饗  
春秋二時仲月上戊日祭之壬戌五嶽各置老君廟六  
月乙酉大風拔木秋八月辛巳降天下死罪從流徒已  
下悉原之九月辛未吐蕃遣其國相論尚他磔來朝冬

十月丙申幸東都十一月丙辰至自東都甲子太子少  
傅源乾曜薨十二月雋州都督張審素以刼制使監察  
御史楊汪伏誅是冬浚苑內洛水六十餘日而罷戊戌  
裴光庭上瑤山往則維城前軌各一卷上令賜太子諸  
王各一本

二十年春正月乙卯以禮部尚書信安王禕率兵討契  
丹丁巳幸長芬公主宅乙丑幸薛王業宅並即日還宮  
二月己未勅文武選人承前例三月三十日為例然開

選門北團甲進官至夏來自今已後選門並正月內開  
團甲二月內訖分命宰相錄京城諸獄繫囚三月信安  
王禕與幽州長史趙含章大破奚契丹於幽州之北山  
夏四月乙亥讌百寮於上陽東州醉者賜以牀褥肩輿  
而歸相屬於路癸巳改造天津橋毀皇津橋合為一橋  
五月癸卯寒食上墓宜編入五禮永為恒式辛亥金仙  
長公主薨戊辰信安王獻奚契丹之俘上御應天門受  
之六月丁丑單于大都護河北東道行軍元帥忠王浚

加司徒都護如故副大使安王禕加開府儀同三司庚寅幽州長史趙含章坐盜用庫物左監門員外將軍楊元方受含章饋餉並於朝堂決杖流瀼州皆賜死于路其月遣范安及於長安廣花萼樓築夾城至芙蓉園秋七月戊辰幸寧王憲宅即日還宮八月辛未朔日有蝕之己卯戶部尚書王暉卒九月乙巳中書令蕭嵩等奏上開元新禮一百五十卷制所司行用之渤海靺鞨寇登州殺刺史韋俊命左領軍將軍蓋福順發兵討之冬

十月丙戌命巡幸所至有賢才未聞達者舉之仍令中書門下疏決囚徒辛卯至潞州之飛龍宮給復三年兵募丁防先差未發者令改出餘州辛丑至北都癸丑曲赦太原三年十一月庚午祀后土於雒上大赦天下左降官量移近處内外文武官加一階開元勲臣盡假紫及緋大酺三日十二月壬申至京師其年戶部計戶七百八十六萬一千二百三十六口四千五百四十三萬一千二百六十五

二十一年春正月庚子朔制令士庶家藏老子一本每  
年貢舉人量減尚書論語兩條策加老子策乙巳還祔  
肅明皇后神主于廟毀儀坤廟丁巳幸溫泉宮己未命  
工部尚書李嵩使于吐蕃癸亥至自溫泉宮三月乙巳  
侍中裴光庭薨甲寅尚書右丞韓休為黃門侍郎同中  
書門下平章事閏月幽州道副總管郭英傑等討契丹  
為所敗於都山之下英傑死之夏四月丁巳以久旱命  
太子少保陸象先戶部尚書杜暹等七人往諸道宣慰

賑給及令黜陟官吏疏決囚徒丁酉寧王憲為太尉薛  
王業為司徒慶王潭為太子太師忠王浚為開府儀同  
三司棣王洽為太子少傅鄂王涓為太子太保五月甲  
申皇太子納妃薛氏制天下死罪降從流流已下釋放  
京文武官賜勲一轉秋七月乙丑朔日有蝕之九月壬  
午封皇子湓為濟王沔為信王泚為義王淮為陳王澄  
為豐王漙為恒王漩為涼王滔為深王冬十月庚戌幸  
溫泉宮十一月戊子尚書右丞相宋璟以年老請致仕

許之十二月丁未兵部尚書徐國公蕭嵩為尚書右丞  
相黃門侍郎韓休為兵部尚書並罷知政事京兆尹裴  
耀卿為黃門侍郎前中書侍郎張九齡起復舊官並同  
中書門下平章事是歲關中久雨害稼京師饑詔出太  
倉米二百萬石給之

二十二年春正月癸亥朔制古聖帝明皇嶽瀆海鎮用  
牲牢餘並以酒醑充奠己巳幸東都辛未太府卿嚴挺  
之戶部侍郎裴寬於河南存問賑給乙酉懷衛邢相等

五州乏糧遣中書舍人裴敦復巡問量給種子己丑至  
東都二月壬寅秦州地震解宇及居人廬舍崩壞殆盡  
壓死官吏已下四十餘人殷殷有聲仍連震不止命尚  
書右丞相蕭嵩往祭山川並遣使存問賑恤之壓死之  
家給復一年一家三人已上死者給復二年辛亥初置  
十道採訪處置使徵恒州張果先生授銀青光祿大夫  
號曰通玄先生三月沒京兆商人任令方資財六十餘  
萬貫壬午欲令不禁私鑄錢遣公卿百寮詳議可否衆

以為不可遂止四月乙未伊西北庭且依舊為節度廢

太廟署以太常寺奉宗廟庚子唐州界淮勝州例立表  
測候日晷影長短乙巳詔京都見禁囚徒令中書門下  
及留守檢校覆降罪天下諸州委刺史丁未眉州鼎皇  
山下江水中得寶鼎甲寅北庭都護劉渙謀反伏誅五  
月戊子黃門侍郎裴耀卿為侍中中書侍郎張九齡為  
中書令黃門侍郎李林甫為禮部尚書同中書門下平  
章事關中大風拔木同州尤甚是夏上自於苑中種麥

率皇太子已下躬自收穫謂太子等曰此將薦宗廟是以躬親亦欲令汝等知稼穡之難也因分賜侍臣謂曰比歲令人巡檢苗稼所對多不實故自種植以觀其成且春秋書麥禾豈非古人所重也六月乙未遣左金吾將軍李佺於赤嶺與吐蕃分界立碑七月己巳司徒薛王業薨追諡為惠宣太子甲申遣中書令張九齡充河南開稻田使八月先是駕至東都遣侍中裴耀卿充江淮河南轉運使河口置輸塲壬寅於輸塲東置河陰縣

又遣張九齡於許豫陳亳等州置水屯九月壬申改饒  
樂都督府為奉誠都督府辛巳移登州平海軍於海口  
安置冬十月甲辰試司農卿陳思問以贓私配流襄州  
十二月戊子朔日有蝕之乙巳幽州長史張守珪發兵  
討契丹斬其王屈烈及其大臣可突干於陣傳首東都  
餘叛奚皆散走山谷立其酋長李過拆為契丹王是歲  
突厥毗伽可汗死斷京城乞兒

二十三年春正月己亥親耕籍田上加至九推而止卿

已下終其畝大赦天下京文武官及朝集採訪使三品

已下加一爵四品已下加一階外官賜勲一轉其才有

霸王之略學究天人之際及堪將帥牧宰者令五品已

上清官及刺史各舉一人致仕官量與改職依前致仕

賜酺三日三月丁卯殺中侍御史楊萬頃為讐人所殺

夏五月戊寅宗子請率月俸於興慶宮建龍池上聖德

頌秋七月丙子皇太子鴻改名瑛慶王直已下十四王

並改名又封皇子玼為義王珪為陳王珙為豐王珙為

恒王璿為涼王璲為汴王其榮王琬已下並開府置官屬各食實封二千戶八月戊子制鰥寡孀獨免今年地稅之半江淮已南有遭水處本道使賑給之九月戊申移泗州就臨淮縣置冬十月辛亥移隸伊西北庭都護屬四鎮節度突騎施寇北庭及安西撥換城十一月壬申朔日有蝕之十二月新羅遣使朝獻

二十四年春正月吐蕃遣使獻方物北庭都護蓋嘉運率兵擊突騎施破之三月乙未始移考功貢舉遣禮部侍

郎掌之夏六月丙午京兆醴泉妖人劉志誠率衆為亂  
將趨京城咸陽官吏燒便橋以斷其路俄而散走京兆  
府盡擒斬之是夏大熱道路有暍死者秋七月庚子太  
子太保陸象先卒辛丑李林甫為兵部尚書依舊知政  
事己巳初置壽星壇祭老人星及角亢等七宿八月戊  
申朔加親舅小功服舅母總麻服堂舅袒免己亥深王  
滔薨九月壬午改尚書主爵曰司封冬十月戊申車駕  
發東都還西京甲子至華州曲赦行在繫囚丁丑至自

東都十一月壬寅侍中裴耀卿為尚書左丞相中書令  
張九齡為尚書右丞相並罷知政事兵部尚書李林甫  
兼中書令殿中監牛仙客兵部尚書同中書門下三品  
尚書右丞相蕭嵩為太子太師工部尚書韓休為太子  
少保十二月戊申太子太師慶王琮為司徒丙寅牛仙  
客知門下省事

舊唐書卷八

舊唐書卷八考證

玄宗本紀卷上先天二年七月李令問銀青光祿大夫  
殿中監實封三百戶○沈炳震曰李靖傳令問累遷  
殿中少監預誅竇懷貞功封宋國公實封五百戶殿  
中監下疑有關文

開元二年六月內出珠玉錦繡令于正殿前焚之○新  
書在七月乙未綱目亦在七月

以興慶宮諸王傳○沈炳震曰下文云並停京官所帶

跨巾算袋此又屬一事諸王傳下應有關文

四年十二月乙卯定陵寢殿災○新書五行志在五年十一月乙卯

八年春正月甲子朔○沈炳震曰七年五月己丑朔日有食之是年有閏則八年正月之朔當是甲寅非甲子也

十年八月安南賊帥梅叔鸞等攻圍州縣○沈炳震曰楊思勗傳作梅元成

十五年春正月辛丑涼州都督王君奭破吐蕃于青海

之西○

臣宗萬

按水經注金城郡南湟水出塞外又

東南逕卑禾羗海關駟曰縣西有卑禾羗海者也世  
謂之青海隋西域傳吐谷渾城在青海西四十里唐  
高宗龍朔三年為吐蕃所併故開元中先後破吐蕃  
皆在青海西即吐谷渾之青海周圍八九百里者是  
也

十八年是春及百僚每旬暇日尋勝地讌樂云云○

臣

德潛

按文在夏四月以下四月不當云春疑三月中事誤書于此

二十一年九月封皇子濫為濟王○沈炳震曰濫封濟王已見十三年三月此屬錯簡

二十二年二月秦州地震廨宇及居人廬舍崩壞殆盡歷死官吏以下四十餘人○沈炳震曰舊書五行志作百餘人新書志四千餘人不應多寡懸絕觀下文遣使給復歷死之家當以新志為正十乃千字之譌

也



舊唐書卷八考證

謹案第十三頁前六行七行周慶立為安南市舶  
使及波斯僧廣造奇巧刊本市舶訛使船斯訛  
期據新書柳澤傳及外國傳改

第二十七頁後八行子孫不許仕宦刊本宦訛官  
今改

第二十八頁後七行御帳殿受朝賀刊本朝賀訛  
賀朝今改

第三十頁後五行幸壽安之方秀川刊本川訛

州據新書本紀改

第三十一頁前二行御史大夫崔隱甫刊本隱訛  
德據本書及新書列傳改

第三十二頁前四行趙歸貞擊走之刊本脫之字  
今增又案歸貞新書作頤貞

第四十四頁前八行率兵擊突騎施破之刊本脫  
施之據新書本紀增



總校官庶吉士臣侍朝

校對官中書臣張塤

騰錄監生臣鄧肇槐